



Editorial

THAUGAU THIL LEH KHAWVEL THIL KIZAWP-MAT DAN

Dan 8:11-14; Tpl 3:9-10.

Pathian chu thagau ahia, lei leh van leh a sung ah um zosia ama siam a hia, a enkawltu le a hi. Thagau leh taksa kikawp i hiu a, i thagau hinkhua chu tisa ah i umdan un a sulang sek hi. Thagau ah titak zet ah Pathian biakna hi thilpiak in a zui ngei ngei sek hi. Mihingte'n Pathian ah i lungthim put dan latsakna dingin khawvel thil i mang sek ui. Pathian chu thagau himaleh khawvel thil tawh thuk tak in a kizawp ui – ama chu bangma zosia bulpi ahi ziakin. Zia gual ma chun mihing hile a taksa leh a thagau khen chuam thei ding gual ahi puai. Thagau lam hinkhua chu Pathian kiang ah taksa leh i thilnei piak dan in a latsak sek hi.

Mi khenkhat in paisa hi thagau lam thil in a ngai puah, Pulpit ah gen ding gual in le a ngai puah hi. I hiat zing taksa gual un “sum ngainat hi gitlona chitin bul a hi.” Himaleh, sum chu a ma chang in soal ahi ziang puai. I mat thiangtho chun Pathian gam letna'n matchak lopitak ahi thei a hi. Mihing in paisa ah lungawina a hawl a, kumkhua ah nei ding ah a kingai a hi chun khawk ma ma ding ahi.

Thagau lam hinkhua susia

thei ahi dan i ngaitua chun paisa leh i thil nei dangte hi lau um ma ma ding a hi. Chapona leh awchatna ten ei pui lut a, Pathian tawh ei sugamla, a neitawm in nei tam, a nei tam in a sang ah tam zaw dawina ei tut ah. Zia chun nasatak in Pathian tawh ei kigamlat sak hi.

“Dangka sum ngainat hi gitlona chitin bul ahi” ti hin taksa thil leh khawvel thil a kizawp thuk dan ei hiatchian sak hi. Ni dang lai ah Gnostic(zitilna diklo)

te chun “Taksa thilbawl bangman thagaulam hinkhua a khawise thei puai” tiin a ziltil sek ua. Zia hi mihing zilsakna a hin, Bible zilsakna tawh a kituak puai.

Sum leh pai hi a selam ah matthei ahi zing lai in, a phalam ah le matna a tam hi. Pathian chun bangkim feltak in a siam a. Jesun le khawvel thilte chu Pathian lungsiatna latsakna’n a mang hi. Ei hawn le khawvel ah thil umte hi thagau lam thil mantam tak a ding in i mang thei ui.

Pathian chawihawina’n: Siamtil a pat in khawvel ah thil umte hi Pathian chawihawinan mat a hisek hi. Bible in la thil nei in Lalpa chawihawi in ti zik ahi gual in.... I thil nei bangkim hi Pathian chawihawina ding in a

mat thei hi.

Pathian a ding ah ginumna sulangtu ahi: “Kua le tawmcha chung ah ginum chu tamtak chung in le a ginum hi”(Lk 16:10). “Sana chu mei ah etchian sek ahi gual in mihing chu suangmantam ah etchian ahi” ti gual in i theina leh thilnei i mat dan hin Pathian lam a i hina a taklang sek hi.

Pathian ei nai saktu ahi thei hi: I thilneite kiphall tak ah Pathian kiang ah i piak chun, ama i nai ui ti phawt chianna ahi sek hi. I go umna phawt ah i lungthim le a um(Mat 6:21). I lei gothil, Pathian kiang ah i kawin gam phawt chun, ama ei naisaktu ahi sek hi.

--o0o--

Nu leh Pate chungah Chate mawpuakna

Ephessa 6:1-2.

By: Rev. Seilunlal Vaiphei

Tu hun ahin Khanglai tamtakte hin khawvel thiamna leh hiatna kisu-
anpi in nu leh pa thu awi sang in, eima thu nuai ah um sak ding ti hi
ahung hita. Himaleh Pathian thu ahin vang nu leh pa za ding leh athu
uh zawm ding in ei hil ui. A chuti ahileh gingtute a ding in mihing pilna
sang ah Pathian thupiak hi zui zaw le hin insung damna leh malzawl-
na tamtak chang ding ihu. Ziaziakchun, Khristian Khanglai Pawlte hin
Nu leh pate chung ah mawpuakna liantak inei ui. Gen ding tamtak
um maleh anuai ahin tamlo cha ala enkhawm hitiu

- Mitin in a Nu le Pateu a za ding uh ahi. Exo 20:12; Lev 19:3
- Chaten Nu leh pate kipak tak a um sak zing ding, Prov 23:25
- Chaten nil eh pa suk thasiat lo ding, mitthi luansak lo ding ahi, Gen 37:35
- Chaten hun hingu nu leh pate thu awi ding ahi, Kolossa 3:20; Prov 23:22
- Chaten nu leh pa thu piak kihiatmawsaklo ah zui zing ding ahi, Prov 6:20
- Chaten nu leh pate thu hilna ngaidau lo ngaithak zing ding ahi, Prov 1:8-9.
- Chaten nu leh pate chung ah thilpha bawl zing ding ahi, Galatia 6:7-10
- Chaten nu leh pate kiang ah zuau genlo ding leh theplo ding ahi, Sam 5:6; Gen 37:32.
- Chaten nu leh pate pakchat zing ding ahi, Prov 31:28
- Chaten nu leh pate ataksap, atek nung ua le hawitaka etkawl ding ahi, 1Tim 5:4
- Chaten nu leh pate kiang ah I daw, I ngai chun I lunggel zosia gen zel ding ahi, Vaihawmte 11:37
- Chaten nu leh pate taw kihepitua tak leh pum khat a chenkawmpi zing ding ahi, Sam 133:1
- Chaten nu leh pate puakgikte leh athilbawl teu kithuapi a panpi ding ahi, Gal. 6:2,10
- Chaten nu leh pa chung ah khut thalo ding, Exo 21:15

- Chaten nu leh pa hansia lawkhum lo ding ahi, Leviticus 20:9; Prov 20:20
- Chaten nu leh pa thununna ngaisak ding ahi, Prov 13:1
- Chaten nu leh pa thasiat ni ah thamuantu pan ding ahi, Vaihawmte 11:36
- Chaten nu leh pa thu ngainep leh thukhel lo ding ahi, Deut 21:18-21; Prov 30:17

--o0o--

NUMEITE UMCHAN KIHIL PHA HITIU

-Naocy Haokip

1 Timothy 2:12

_Mi hil ding leh pawsal chung a thunei ding in numei thu kape puai; thip bek cha'n umthim ngetnget zaw hen, kati a hi.

√. Bible I et leh Sawlchak Paul lekthawt te hin numeite umchan ding zosia agen hi. Bible I sim leh kihil thaw, kigenpiaktua sanga le gilzaw leh hoizaw'n ei hilchian set ahi, ahileh Bible'in ei hilnau toh tulai khanga numeite I chawndan'uhi kituak/kilawm isa na'u em?

*√. Tulai in numei tamtak a pawsal sanga chungnun chu a, apawsal thu lalo, ama thunuai ah apawsal umsak a, insunga ama dawi dan dan ah vaihawm atam tai, zia ti gual hi bawlthei kisakna

tak-a kilak le mi aum sek hi, hin-la amau hin Bible thupiak a zuilo bep hilo in a palkek tau a hi.

*√. Numei zingkal khawlai nuamtak a vak vel a, a pawsal insunga buai tak a anhuan, insung suthiang, bangkim a bawl a, ala-wi-agual hung khawlai leng te a ding tui hawm po a pang, nuam taka kihopi man a umlo, insunga mipa khat zia guala numei dinmun atuk kiti hi, numeite diklona kichiantak ahi. Numei in apawsal aza bawl leh zia gual umchan hi buaina khawktak khat ahilo ngal

leh abawl lo kei ding khat chu ahi. Zia ti gual numei hin numei-pha kahipuai tia ama leh ama kipholang ahiu hi.

*√. Bible'in ei hil gual in "Pawsal hi numei a dinga luchang ahi, apawsal za bawl lo chun aluchang aza bawl lo ahi," ati, (1Cor. 11:3 Eph. 5:23). Mihiam hi luchang bei a kuama ahing umlo ahi, khut leh keng bei a hing vang aum in, luchang bei a hing vang a ki hekha puai, ziaziak-chun Inneipu zabawlo numei chu a hinlai sunga inle athi ahi.

*√. Numei khawlai len hat, khawlai vak hat kiti hi insung buaina pawlut tamte ahi sek ui, numei vakhat tapo in insunga thilpha, thupha, kichamna apawlut hi ti kihebekset lo ahi, zia gual ma chun mi nei thangsiat ziaka insunga kiphinna kinakna chawkdawk atam nuam sek a hi.

*√. Numei hi bangtawh bangin lim-leh-mel hoi, duanghoi, hizianglehle a chawndan leh tawidan in thu agen sek hi, numei kilet-sak, kilopisak, kihochampi theilo, mi ngaisaklo(gelkhawlo), alian aneu hawitak cha dawnhu ngailo

kiti te hi sana tuikai hiziangleule mi nuainung pen, lungsiat umtak ahiu, alim-amel duanghoina zosia chu ama dinga mawk pamai bep ahitai, asiampa'n mat nuam na khat neia asiam ahi geldawk lo a, asiampa do dinga kisate ahiu hi.

*√. Numei khamthei lawp kiti hi hansia lawna ahi, Bible'in khamthei a lawp chu mingawl ahi ati, (Prov. 20:1). Pawsal in khamthei anek-adon leh numei in pauchapna hattak ah aheth a, a siamphat aguath ding a hi, tula in vang pawsal sangin numei khamthei a lawp hi atamzaw ta ahi, a numei zaw bawn ahitileh pawsal chu ahisa tithei ahi, hinla zia a kigen vanga chu pawsal inle bawl tei tei ding tina ahi diak puai.

*√. Numei hi thahat thagum a nasem thei te bep pachat thei ahi puai, numei thatawm, lungtawm ihu a, lungnem tak leh ki neusak taka, kiphalam takcha umjing na hin pawsal thahat tak le bailam tak cha azaw ahi, aziak chu numei chu hang zakzak, kiltawm-kikozak a kiletsak tak a dumchep khu kitung hial a khaw-

lai leh insunga kize velvel ngailo ahi.

*√. Numei ching chun achung a mawltum chu kha thei ziang le a nunnemna leh kiphalam takcha a umdan in gamla tak a akichawn mang sak thei hi. Numei umchan helo hang zakzak chun mawltum gamla tak a um le a kikolut ah, a chungu chu kha sek a hi.

*√. 'Pawsal azi chungu khutha te ka lau hi' tia ka-ute pawsal khat kianga ka gen leh, ama'n "Numei pha chu a pawsal in avaw/zep ngaipuai. Numei phalo chu a phatna dinga vawk/zep chu apha ahi," ti'n ei dawnhu hi. Ka gel leh dik le kasa'i, numei hi lungsiat umtak leh muda umtak akihi sek hi. Ziaziakchun Bible'in ei gen gual in 'Numei umchan pha chu a vangpha ahi'.

***Proverbs 31:10**

Numei zipha chu kua ahem mu zo ding? Suang mantam san chi sang inle a lul zaw'i.

Numei pha kiti chu Suang mantam hoitak leh man tam tak sangga le lul zaw ahi. Ziaziakchun "NUMEITE UMCHAN KIHIL PHA HITIU" a selam a kipachat a kit-ilkho kho hun ahi ta puai. Numeiten le Pathian gam ah I sep ding uh gam liantak a um hi, Ziaziakchun umchan chawchan phate zui in kisiampaha vak hitiu.

* Gen ding tamtak um maleh tuni a di'n hunsak tai tiu. Asim zosia'n taksa leh thagau ah umchan pha I zui dik zing thei na ding un Lalpa I Pathian angunga ka hung landawki hi. Amen!

--o0o--

Pathian chung ah bang gual in i kipâk u em?

(Luka 17:16)

Pro. Pastor Khaiminlun

Thumapui: Gingtu i hi na'in pauchap hi i bawlo theilo a hi. Chun i pauchap a, kipakthu genlo kilawm i saklo ziak in a min in i vak gen zawt a, a ban vang chu Pathian dawilo leh dawilo thu gel se selo in i dawilo cheng i sât thasuk jel mai a hi. Achang leh pauchawp a lunggil tak a kipakthu gen ding le peilo, limsak lo tampi i um ding gingchak a um hi. Ahin khawvel thu in mi kiang ah sum ei piak ziak a hem, i dawilo khat ei bawl piak ziak a hem, lawtin na ziak a hem tak leh kipâk thu taklat hi i leibat gual in thupi tak a, gen bep hilo in, thil piak in le na sa tak in i bawl sek uh a hi. Pathian chung leh mihing chanpi te kiang ah kipaknau i suklat dan u vak buk hi tiu.

1. Simaripa kipak dan:

Luka 17:11-19 sung hi sim chiat masaphawt ngei ding in i vak ki tiam a hi. I bible simnau a hin Jesu chu Jerusalem juan ding a a chia lai in khua pakhat a chun phâk natna in a tuam mi sawm in a la lamtua uh a hi. Jesu chu a chung ua 'jangai ding in gâl a pat in' kiniamkhiak tak in a hung kiko tau a hi. Lal Jesu'n le a hiat in 'thiampute ki-etsak ding in' a la sawl ngal a hi. Zia zaw a chun a lak ua pakhat chun a damtai ti a kihiat phat in 'a hung kilekît a, aw ngai tak in Pathian chu a chawihawi ta a hi.' Zia bep hi lo in a 'bawkkhup in kipakthu a gen ta a hi.'

Tulai covid natna veite quarantine a hi gual un, zia hun lai a chun phâk veite chu khaw pawlam mi umlo na in a la kawil sek uh a hi (quarantine) (Thiampute lekhabu 13:45,46). Phâk pasawmte chu khaw pawlam ah a um zing lai un Lal Jesu a hun mu tau a hi. Phâk vei leh veilo te kikaisawn thei a hi ziak in, mawk nai ziang lo in 'gâl' a pat in ki ngaitawm tak in a hung kiko dawil tau a hi. Phâk sawmte hi a enkai leh panpi tu ding kineppi kuama umlo, phâk leh phâkte ma ki kaitua in, kuama'n a nai lo ding ah 'khawtang dân' a um lai in Lal Jesu panpi tu ding a mu tau a hi.

Chun, phâk veite a dam tak u leh kithawina dan (Thiampute lekhabu 14:1-32) bik a um a hi. Zia chu bawtsialo in Lal Jesu'n phâkte chu thiampu ki-et-sak ding in a sawl ta a hi. A gen zaw a chun a lak ua pakhat chun a 'damtai' ti a ki hiat phat in, a lawite'n zuilo ma leh, a sudamtu Lal Jesu lam a zuan kî'ta a hi. Hun lemchang dang ngak gaw se selo in a pet pet in lal Jesu a mu nuamngal a hi. Khawpam lam ah kidak pai na mun a thakdaw a umte chu a dam ni ni in a bawl nawp leh a mu nawp u tam ngei in a, a hin la pakhat chu lal Jesu lam nga'n Pathian a chawi hawi ta hi. Chun a 'baw' khup in kipâk thu a gen' ta a hi.

Zia pa chu Lal Jesu keng bul a chun a mai ah tual situa in kipakthu a gen ta a hi. A damna lam chu buapi pi pen lo in a damsaktu lal Jesu âng a chun kiniam khiak tak leh titakzet in kipakthu a gen ta a hi. A ma hin thil dang a buapi masalo a hi. A natnau chu a mawkdam ziang ding a hilo leh kinepna dang umlo, kuama limsaklo in thi ziang leu le a hiding him a ngai a umta te chu Lal Jesu'n a va sukdam a chun pakhatbep in titakzet in ki-

pak thu a va gen a hi.

2. Samaripa a pat zildaw leh zuitheite:

Chanchin chawm i vak simnau a hin zil ding leh hiat ding tampi um in a. Ahin, tuni i vak gen nawp u chu 'Samari mi pa gual in Pathian kiang in kipakthu i gen u em? Bang gual in kipaâkthu i gen u em?' Ti hi vak ki dawng thak ding in lal kichial a hi.

2.1. Pathian l chawihawi na'u em?:

Covid khawksiat lai tak in hatna hui (oxygen) taksap ziak in, a gilkiak tak leh khawksakna neilo gam sahing te nekding a kichu ziang gualun, chawmkhat chu hatna ding 'hui' kichu in mi tampi a buai a hi. Ahin tuni zia Damna Aw hi i sim thei a hi chun Pathian a pat damna i mu a hi. Zia bep hi hilo in, zingkal khawvakte imu, taksa mamaw ann te ine thei a, taksa'n a pawimawlo te thadawk thei in i um a, nek hawlna, thiamzilna, nasepna chuam chuam te hin le tawtin na i mu jal a hi. Zia haw zosia hi gingtu te a ding in vang Pathian jal a hi. Zia haw ziak a hin Pathian i chawin nau em?

2.2. Kipakthu gen hi l kawi masa na'u em?:

Damlona a pat damdawk, thiamzilna lawting, leh a dang dang Pathian a pat maljawlna l dawn na'u a hin kipakthu gen hi i bawl masa na'u em? 'Dan leh, dan leh' ti ah hun i suan jel a hi chun kipakthu gen hi i ngaikhawk lo ziak hi thei a hi. Pathian a pat maljawlna dawng a i ki hiat a hi chun a pet pet in Pathian kiang in kipakthu gen pai ziang hi bawl ding in i ki chial uh a hi.

2.3. Kipakthu bang gual in l gen uh em?:

Kipakthu i gen tak u leh bang gual in i um uh em? Jân imut ding kuan in Pathian kiang ah kipakthu i gen tak leh lunggil a pat kipakna a hi na diam? A min mai mai a lupkawm vel po, a hilo leh vak hâmphit sung kal mai mai po in kipakthu gen bep i hui em? Samaripa vang chu Lal Jesu kengbul in a mai tawh tual a si tua a hi. Eima nawpsak leh lemchang dungjui hilo in, kiniam khiak tak leh titakzet in lunggil a pat Pathian kiang in kipakthu gen jaw hitiu.

2.4. Kipakna thilpiak inle sulang hitiu:

Tulai khawvel chia dan a hin mi kiang ah kipakthu gen a hem, mi kipakpi a hem a i chia

tak a hi leh, kuama'n ei phutlo lele, kam a vak gen hi i dawikhawplo a hi. Thilpiak tawh i thua ua, chun mi dangte thilpiak sang ah tawmjaw/neujaw a hi khak ding le ud um isa lo uh a hi. Zia chu a hi ziak in, genthei in Hausa lele, buai in buailo le le i chung ua maljawlna gua juksak jing Pathian kiang in kipakthu etsakna a thil piak a tawmlam hilo in i thei khamtawk a i bawl uh a hi chun Pathian in hun hemil kei lo ding a hi.

Thukhakna: Khaileh, l article sim nau a hin ngaihak isak deu a hilo leh pawm haksasak le um kha maithei in a. Bang chu hita lele i bible taklatnau a imu, kuama'n a panpi theilo phaksawm te sukdam a hi lai in Samari mi pa, gual a hin Pathian a pat maljawlna i dawnte i hiat a hi chun hunlemchang ding ngak sese lo in Pathian kiang in titakzet a ki thunun in kipakthu gen jel hitin un, chun khawvel chia dan gual in i kipaknau suklatna in sawm a pakhat bep set jianglo in thawlawm thilpiak inle theitawp sua inle sulang jel hitiu.

Simtu zosia Pathian in hun maljawl ta hen.

SETAN LALNA GAM CHU

**-By Upa L.T. Khupa,
Hq. Tuibuang**

Setan hi gitlo ah apuk ma chun angelte lak ah a chunnungpen pawl hi ah hiat ahi.

Setan hin leichung ah thuneina piak ahi thu agen ah. Miling siam ma leh gitlo ah a puk ma khan, thuneina Pathian in ala pia ahi diam?(Luka 4:6, 1Johan 5:19) Zia hi hezing lehin setan chu zuau gen hat ahi ti hi. Jesu khan setan thugen kha a pawm pua Pathian lekhathun a pawm pua, Pathian lekhathun a lektha ahi.

Mitamtak chun Adam kiang a khan thuneina piak ahia, Adam khan setan kiang ah ala pia sawn kit le himaw dihem a tiu ah. (Genesis 1:28) Maleh setan hi ama leh ama kithem hiding in ka gingchai, Adam sual ah apuk khan Adam thuneina kha changta gual ah kingai ziang hin ah. Setan hin ama zuitu te leh ama kiang ah kitulut te kiang bep in vai ahawm hi.

Pathian chu khawvel pum-pi ah vaihawmtu ahia, setan chu a dawigual gual in a ut hunhun

ah a thunun thei leh a sung ah um zosia hi Pathian a ahi ngal ahi. (Sam24:1)

Sawlchak Paul in setan chu zia khawvel Pathian chu ahi ngei ah(2Korinth 4:4) himaleh zia khawvel Pathian ti hin setan in zia lei ah hin a ut ut a bawl thei tina ahem. Pathian in zia haw bawling chun dal theina a nei puai tina ahem? Ahi chuam puai. Lalpa Jesun leh leh van ah thuneina zosia a kiang a piak ahi tak thu a gen a (Matthai 28:18) Lalpa Jesun leh leh van ah thuneina a nei tak chun, Setan chun Lalpa Jesu a pat phalna a mulo chun bangma bawltthei loding tina ahi.

Pa Pathian chun a sawlte apat leichung leh van ahin thuneina zosia a nei a, Jesu kiang in lei leh van ah thuneina petu hi le Pa Pathian ahi ngei ding ahi. Pathian chun Jesu kiang ah thuneina peding in thu neina anei a hi. Ziaziak chun Jesun a Pa chu

lei leh ban ah Lalpen ti in a gen (Matthai 11:25)

Bible in Setan chu Zia khawvel Pathian leh Vaihawmte hi ah agen hin a umdan chu mi piangthak lo, Zia khawvel ah mite chung ah lal ahia vai a hawm ahi. Ama setan chu a zui ziak uleh a na abawl piak(seppiak) ziak ua a hetchian uh ahem hetchian lo uh a Pathian uh ahi.

SETAN A LAWSAM

1. Pathian guala(tuka) um a tup ah a lawsam chian mamai(Isai 14:12-17)
2. Lalpa Jesu chu Thep(them) ah zaw a guai, a lawsam kei hi(Matthai 4:10) Lalpa Jesu hun Kross chung in kichian tak in a zo zaw ahi (Kol 2:15. Heb 2:14)
3. Hukdam chate a ding ah Pathian thil bawl guat leh guangal taphot a dodal vek ah, zia hin le lawsam zel in a.
4. setan thiltup nunung pen chu mihing ah hung kisiam ah dan bawtsepa, Jesu dodaltu ah kisiam ahi(2Thesso 2:4, 1Johan 2:18, 4:3)

A lalna gam siam a tupna kichaina chu dan bawsepa mangchan tunsak hun guan ah, maleh zia hile lawsam kit ina, Khristian mek chimit vek ding ahi.

Pathian dodal leh a lemguatnate hiwak chu setan thiltup ahia, mipite them ah chanchinpha amu theilo nading ua a mit uh sukthum chu a thiltup ahi.(II Korinthm4:4) Hukdam chate chu nungto ding in a buan zing hi. (IThesso 3:5. IIPeter 2:1)

Khrista hungkit na ding I nai tak ziakun, thilmak bawl mangchân mi tamtak them ding ahi. (Matthai 24:24 ; IIThesso 2:9:11; Thupuan 13:13-15; 16:14; 19:20) Zia ziak tak ahin thagaute fia(chet) angai ahi.

--o0o--

KIPAK THUGEN THEI LEH MAWPUAKNA HIAT HI APHAI

-by K L Muana Vaiphei

Tuni I holimna di'u leh I genkhawmna ding ua a thupi ding ah kadawi chu kipakthu genthei ti ahi. Zia chu ahizing kawm in kamthiam ah, kipak taktak le hilo, mukthiam kamthiam ah, kilawmsakna kakipak ti himhim chu kipak ti theilo sang in a phazaw himhim hi.

Kua ahem khat in a phatchuampi ding ahem ahiloleh a kipak theina ding I bawl piak hun ah kakipak ti ziang thei nailo maleh, a lungthim guk leh a ngaituana khat bek chu thilpha ahun bawl piak te chung in, thilpha khat bek bawl thuk a nawp ngei ginchat a um tho hi. Midang te a ding ah thilpha sep hi ama'u kipak ziang theilo maleu, a bawltu chu a lungguk tak in a kipak tho sek hi. Zia gual achun, kakipak ti kammal leh midang te a ding ah thilpha bawl guatna'n mimal hinkhua ahin kinepna leh kimuan-na anei un, taksa leh thagau inle damtheina leh malam kinepna hing ei neisak ngei ding in ginchatna liantak kanei hi.

Zia gual ah mimal, eima leh eima mawpuakna I liangko ah I kiguan ah, tup leh ngim ah I nei di dawl chu ahi. Etsakna'n, Pathian kiang in malzawlna,

damtheina, pilna, hausakna leh a dang pawimaw te I dawt na khel leh I changuallo malzawlna ei zangvuk sek ah "Lalpa kakipak hi ka changuallo malzawlna chitin in lei malsawm ah ti'n kipakthu I gen sek hi".

Ahinla, a chanchinpha puanzakna lam ah I finlona te leh a malzawlna I dawn te'u apat thilpiak lam ah I taksap sek uh hi mihiam pawmdan leh ngaidan gual ah, Lalpa'n ei ngaita leh a malzawlna ahun piak te hi dawngtak I hina diam ti chang a tam sek hi

Zia gual dinmun a khawsa mihiam te chu I hiziak un, malzawlna ei petu lunglam helopi'n a malzawlna nawpchenna mang ah I mihiampi leh guattu Pathian hiatmil khak di chu I tawpna di'u chu tang sangtak chung ah Sakhi tuidu dangchak ham ngawingawi gual I hikhak di'u hi thil lau um

ahi. jgak in malzawlna lunglam leh dawi gual a mihiam te himak-maw chu subuting in pan la sem ding ngaichat leh kinepi ihu

Chun, a tawpna pen leh a khaikhawm tu ding in, ka hinna an ka piat, nang bang lei pe diam ti leh thilpiak ah nasem di,'n Lalpa'n ei ko peta tichun piak in um inla'u. Thilpiak in Lalpa lan

zopuanla'u ti umzia hi ngaitua in khawvel leh a sung ah thilhing zosia te chingtup leh enkawl ding a ei ngansiana te leh Ama lalna ding ah mawpuakna ei piak te hi sembukim zo chiat ding in, Lalpa'n gualzawna hatna ei pe ta hen, amen.

--o0o--

KHANGLAITE SIATNA A LUTLONA DING

**By : ÷ Samuel Satminthang
Kipgen**

1. PATHIAN GIN DING AHI:

Pathian gin ding kiti thilsia huat bawl ding tina ahi (Proverb 8:13). Khangdawng hinkhua hi siatna'n aum kimvel a, siatna'n valtum ding a achan zing ahi. Ziakiakachun, Khangdawng ten siatna hi a dawilo ding uh ahi, I huat bawl zawk ding, siatna haw hi I thi gam sak ua (Kol. 3:5) Pathian thupiak (zia chu Thilpha) dungzui a I um ding zawku ahi (Psalm 119:9). Achutilole siatna a khelut tei ding I hui.

2. NU LEH PA THU NUN DING/NGAIDING AHI:

Naupang khat chu a umdan dingdawl taka aum ding angai hi. Nu leh pa hin chate hi achiana ding gual takah athumawp ahi (Proverb 22:6). Ziakiakachun Naupang chu diktakah achiana ding guala achia theina dinga lampi phapen chu "Lalpa ah Nu leh Pa thu nun" hi ahi (Eph. 6:1). Lalpa ah, anu leh apa thunung zing Naupang chu siatna'n azo ngai puai. Ziakiakahin Siatna a I lutlona di'n Nu leh Pa thu a nun ding poimaw a hi.

3. LAWIPHA TAWH KIVAWP DING AHI:

Naupang lai hi Lawi-leh-pai ngai hun laitak ahi. I lung-dawna, I lunggimna, lung-nawpmawna chuleh I kipakna te haw le inu-ipa kianga gen sang in ilawi-ipai kianga aki-gen nuam zaw sek hi. Gualpha toh kivawp chu pha ding, ching ding ahi, gualpha lo tawh kivawp vang chun tuasiat atuak ding, siatna a khelut ding ahi (Proverb 13:20). Gualphalo in hung hepi kisa in, zu-leh-sa khamthei a hung thamuan ding, la kipakni phat leh le zu-leh-sa ma'a hung sukupak thanawppi ding ahi, ahinla zia chu siatna'n a ahung zawna ahi'n, zia chu thina le ahi (Proverb 14:12). Gualpha chun vang la lungngai, lungdon, thasiat phat lehle Pathian thu, thilpha a hung thamuan ding, hung tilkhau zaw ding ahi (1 Thes. 5:11). La kipakni phat leh le thagau lam gualnawpna hung neipi zing ding ahi. Zia chu siatna galzawna ahi.

4. I LUNGSUNG HI PATHIAN THU LUA DIM SAKDING AHI:

Mihiam hin thilsia hi ilungua I gelzaw phat uhleh ibawl

sek uh ahi. Khanglai in le Pathian thu, thupha hi alungsung alua dim sak jing ding (Colossa 3:16) chuleh hun sin a Pathian thu hi ilunggil tak a gel jing ziang ding ahi (Philipi 4:8; Proverb 4:21; Psalm 119:97). Chutileh siatna hin alungsung'a mun anei lou ding, thilsia gelna hun anei lo ding ahi. Zia phat chuleh siatna lut lo ah, siatna gal azaw tei ding ahi.

5. THILPHA BAWL ZING DING AHI.

Khangdawng lai hi thahat lai ahi. Ziakiachun, Hun sinah chimtik neilo a thilpha ibawl zing ding'u ahi (Galatia 6:9; Proverb 4:27). Chutileh thilsia bawlna ding phat umlo ding ahi. Thilsia bawlna ding phat chu thilpha bawlna a zaw zel hi ding ahi.

6. I LUNGTHIM I THU THU'U AH NUNSAK DING AHI.

Khangdong lai hi thisan hatlai, thahat lai, lunghat lai ahi gual in, a lungthim a thilsia akilang thei hi. Ahinla Bible in vang "La khangdon lai lungtup leh la duthusam apat in jam in" ati ahi (2 Timothy 2:22). Aziak chu zia chu thilsia ahi. I lunga thilsia akilak khak tak inle ki control

zaw angai hi (Proverb 25:28) Paul in 'Ka taksa hi ka sawizoi sek in, ka thunun sek ahi. Chuleh l lungthim uhi ithu thu a iki nun zaw sak tei ding u angai hi (Proverb 16:32). Chutileh siatna'n khangdong nang leh kei ei zolo ding ahi.

7. PAUCHAP ZING DING AHI.

Khangdong khat hinkhua chu a ngaina gualin, lungngai ni, genthei ni ahilo leh dongma tawh kihiatthiamlo ziak a lungnawplona, ki ngaisiatna aum tei ding ahi. Ahinla, zia haw zosia chu thepna ahi ngal in, phatna a le zaw ding ahi.

Ziaziakachun, bangkim hi Pathian kiang a piaklut zawk angai hi. Ahinla, siatna ah kibual ut zawkna a nei le

aum in, zia mi khangdawng chun nawpna/phatna sangin gentheina tuak zaw ding a hi, thina chan atuak ding ahi nalai hi. Ahinla, Pathian kiang a pelut a, Pathian kiang a lungmuanna kihawl zawk te chu Pathian in a malzaw tei ding, thilpha zaw achansak ding ahi. Aziak chu Pathian in ei khankhua ding agel ahi (1 Peter 5:7; Philipi 4:6). Nang leh kei le siatna gal l zaw thei na di'n chawlllo ah pauchap zing hitiu. (1 Thessolonika 6:17; Ephesa 6:18).

Simtute zosia Pathian in malzawl ta hen

--o0o--

Beigual hi taksa leh thagau ah kisoizoi ding in aw.

Rev. Thanglianmang

Beigual tha September hi kochuam ten biakin leh In ah kalsuan in lawk tak ah i matchiat uh ginchat a um hi. Beigual in atup pen chu kochuam te haw thagau ah ki chawhal thak di ahi. Thagau ah jongkhal, ama ngon ah dingdok jolo te chu le kochuam mipi panpina jal in, sukhal kit thei ahi. Chuleh, eimau chiat kiha bol ah, beigual sung ah pathian thuthak leh lathak i don chun alawk himai ding ihu. Beigual matna, lawk leh lawklo chu ei mau chiat ah kinga ahi. Beigual lawkpi khenkhat ten Tu chung beigual in ka thil chin phalo zu, khaini, kuva, dumzial te haw ka hai tai ti thei te hi kipakpi um tak ahui.

Solchak Paul hinkhua apat taksa leh thagau ah kisoizoina:

1 Korinth 9:27 na chun Paul in Midang kianga ka tangkopi nunga paithak ah ka um lona dingin, ka taksa ka soizoi in ka thunun sek hi ti mu ahi. 1 Timothi 4:7 nan le Timothi kiangin pathian ngaisakna lam in kisoizoi in ati thu mu ahi. Solchak Paul chu ahinkhaw pumpi chanchinpha genna mang jiang ta maleh, setan in ataksa chu a soisan. athagau lam hinkhua chu achokbuai sek ah, ziaziaakchun, ama leh ama ki engbol in, ataksa chu pathian thu ah um din a thunun sek ahi. Tichun, thepna chuam chuam te chu dozo in, ahinkhua toplam achun Kidona pha chu ka dozo tan, kitaisiakna chu ka mualsua tan, dikna lallukhuk chu kei din koisan aum tai

ati ahi. Ama hinkhua gual achun, thagau lam ah acha Timothi kiang ah le Pathian thu ah kisoizoi dinga agen ahi. Ziaziaakchun, ei haw le taksa leh thagau ah Beigual sung hin kisoizoi chiat ding in pan lai tiu aw. Pathian lam ah kalsuan nailo te hawle khatlaw gaw chiat in, nungtol te haw le dindaw gaw chiat hi tiu. Pathian tawh kilem lo ten le Pathian tawh kilem hitiu in, mihing chanpi tawh kilem lo ten le kilem gaw chiat hitiu. I lampi hawlai teu ki enchian thak kit hi tiu. Kumkit beigual matkit leh matkit lo chu i hinnau ei mau khut ah um ahi pawn-gal ah. Tuchung Beigual hi nang leh kei dinga hun leh phatpha nunung pen pathian in ei siampiak ah ngai in, pathian lam in kilekit chiat guai tiu. Lalpa chu lopina chang ta hen.

Pathian in a thu awi ding in ei dawī hi.

Matt. 7:24-27; Joh. 15:14

-By Rev. Seilunlal Vaiphei

Mihing khat chun lawi leh gual kinei chiat ding ahi. A hileh i lawi leh gualteu chu eimau kiang ah bang gual in um ding in i dawī uh em? I pawimaw na zosia ei panpi ding leh ei thasang thei ding bep in ahem? I pawimaw na mun ah ei ngaisaklo te leh i thugen ei nial kal zing ziangte chu atawp leh lawi ding inle kidawī talo ding hilo ahem? Eimau inle lawi pha ding i dawī gual in Lal Jesu ngei inle athu ngai ding leh a lawi ding adawī dan anuai ahin ala en hitiu.

Jesu lawi pha hi nuam chun a thu a awi ding a hi:

Khawvel ah Lal Jesu alenlai ah khan alawī ding in mi 12 te ala siam a. Lal Jesu'n chanchinpha agen phat tak leh a nungzuite leh ngaitha tute kuama a thugen lai in navek um in a um ngai puau hi. Biakin ate, in mun ate, lawng chung ate leh mun dang dang ate thu agen phat tak leh a thugen ngai nuam, zui nuam ah alawī hi nuam zosiate'n ama ahun zuan sek ui. Zia lo a chunle a melma pakhat lekha thiam, Juda dan thiam thak khat chanchinpha ki tangko pi zosia suk mangthai guatu Paul ngei le a lawi ding in ala siam kit hi.

Pathian thu ki genna ta phawt in mipi achia khawm seku'n, phun chiak umlo in gun ta-

kin a ngaitha sek ui. Himaleh, a thu ngaithak mai chu Jesu lawi pha hina ating tak tak theilo ahi. Lawi pha hi tak takna ding ah chun a thu awi angai hi. Etsaknan, i lawiteu khat in i kiang in thil hun dawn takenla, athugen chu ngaitha'n pia diaklo leu hin a dawntu a ding ah chun um zia nei diak lo ding ahi. A thugen ngai tha'n a gen gual ah i bawl piaklo chun lawi leh gual ding in ei dawī ta him him lo ding ahi.

Jesu thu awi chu suangpi chung ah In kisa gual ahi:

Jesu thugen ngaitha ah a thu awite chu alawite ahiu hi. Zia gual mite chu suangpi chung ah inn kisa gual ahiu in, athu awi lote chu vang piaunel chung ah inn sa tu gual ahiu. kua hem khat chun

luipam ah In sa tahena, a In sak chu suangpi chung ahi chun tui hung lian ta lehle sia diak puan tin, himaleh suangpi chung hi lo ah, piaunel chung ah in a sak khak chun, tui a hung let phat leh bail-am takin tawk mang mai ding ahi.

Kua hitaleh Jesu thugen taksangte chun kumtuang hinna, hinna det tak chu anei sek un, A thu mang lote chun vang kumtuang hinna det tak anei thei puau hi. Lal Jesu thu a awilo ziakun a gilo sek ua, Pathian thu hingte angaitha pei ngai puau hi. Zia gual mite chun puitute, nu leh pa, asang ah upa zawte thu manglo in guchak, kisual, mi sukbuai tite a ching sek ui. Zia gual mite chu Jesu'n le lawi ding in a daw lo ahi.

Thukhakna: I Bible sim nau apat i mu gual un, Jesu thugen ngaitha tute ki etdik theina dingin In sak tekhn thun agen a. Lal Jesu thugen hia ah zawm tute hinkhua det dan leh a suklin zaw ahilo dan hiat daw thei ahi. I gen tak gual un, Jesu thugen ngaithak mai mai hin lawi pha'n ei siam pua, a thu awi hi ama lawipha hina zawk chu ahi. Jesu ngei in ala gen Johan 15: 14 na achun ***“Thu ka hun piak zosia hi la hiu a hi chun ka lawite hi'n lau”*** ati ahi.

--o0o--

AWTCHA-KIN

Exodus 20: 17

By K.L. Muana Khaute

Pathian in Moses kianga mihiamte zui ding, hinpi ding a thusawm piakte lak a pawimaw ma ma khat chu 'Thangsia-kin'/ 'awtcha-kin' ti hi ahi. Zia thupiak hi mihiam sual a puktasa a ding ah zui dik chu haksa ma ma di chu ahi. Ahinla, i zuilo chun Pathian dankal leh a cha thununlo chu ki hi mai di dan chu a hi mai a, zia zui ding achun gingtute iki singsak chiat uh chu ngai tei di i hiziak un, zui zo chiat ding a ngai chu i hiu.

Zia thupiak zuilote chu Moses dân achun, suang a selup ding i hiu a, zia sal achun ganthisan ah ki thawithian theile ala himai thei, a hivang in a chapa Jesu thupiak apat chun suachatna ding lampi a um thei him him puai. Awchatna leh itthikna hin mihiam ngaituana sual in ei puilut ta sek ahi. Zia do-gal liantak apat ki chintupna ding in, ei ma ah um 'Pathian Thagau' tawh a ma zawna ei piatu thagau tawh i pankhawplo chun zawgual ahita puai.

Awle, zia thupiak awtchalo ding a ei thupiak hi, I zaw theina ding un eima ki thununna leh Pathian panpi nalo achun, mihiamte nan gual hilo di ahi. Zia zawna ding achun, Pathian kianga kipumpiakna a ngai ta ahi.

Amasapen in, eima ki thununna tawh Pathian kipumpiakna thianthona bukim tawh I chenkhwamp mailo chun awchatna leh chan-tawh ah lungawina hi mihiam a dinga chun thil hitheilo leh zawgual ahi puai.

Zia a chung ah Pathian in Moses kianga a thupiak 'awtchakin' ti thugûn hi I hinnau in nei leu hin, eima mimal le kipak in tin, zia gual bawh achun, i mihiam chanpite le lîm leh leh kipak in hinkhua mang ding a hiu. Siamtu le kipak ngei di ahi.

Thupiak zawna hi kichang taleh khawvel ah dodal le um puan tin, gam khat leh gam khat ki do in, mipi nautangte le lungngai beidawng kial leh chakte um talo ding ahi. Khawvel hi limna leh kipakna pak-bang

hung lun thak in, Pathian le a ki-pak ngei ding ahi. Khaile unau, Lalpa thupiak hi zui chiat leu hin leimun hile vangam hun chang ta mailo di a hem? ka ti vawng vawng hi.

Alelam achun, Pathian melma Lucifer a um ah, ama chun khawvel leh a sung ah, umte hi suk lungngai him him di hi a thil-tup chu ahi. Himaleh, a tawp ni tak leh Pathian in ama leh a nungzuite chu tawpchin umlo

a pai leh gawt in gualzawna chang thotho ding i hiziak un hin-lai damsung bang haksakna leh gim umna a hung tun in thuak zo tak in kunglam chu del tun tun hitiu. Zia leisiat hansedawng tasa hi thununna tawh zui galkai ham ham hitiu in, Jerusalem thak siam guai tiu. Zia chu Lalpa lunglam a hi.

*Zia haksatna zozai chu mualsua
ding in Lalpa'n ei puizel ta hen,
Amen!*

--o0o--

Dik la sa em?

By:- Rev. N. Dalla

1. *Esau in a upat hina an kamkhat mai ah a ki zawk daw ziang kha aw-imaw umtak a bangna chuh! eilawi inle an kamkhat sâng ah thupilo zaw'n i hinau i la ki zawk mang khâk sek uh ahi.*
2. *Juda Iskariot in a Lalpa a zawk mangna dangka sawmthum kha tâwm isa mai thei ua, lou mun chawkna kham ting ei vei..! eilawi in i Lalpa i zawk mang seknau hih! ngaitua tia, 'kamkhat po, thaikhat po, muam khat po' ala hisek ei vei..!*
3. *Peter khan Lal Jesu a phatsan na kha thi'kawt ah adin ziak hiding ahia, eilawi in Lalpa Jesu i phatsan seknau tamzaw hi, thi'ding lau ziak hilo in, mani lâwkna ding i ha hawl bêk ziak uh ala hisek zawi.*
4. *Esau kha cha thu ngailo tak a bat vâng in, a pa malzawlna dawn in a ângsung in a ki tulût ah, eilawi mi tamtak chu pa âng ah kûn nuamlo, chapo tak ah pate lamdaw sa nêk gua a ki tam ta ahi*
5. *Khawvel thuthang (news) la ha sim chan chuh, lungdawna te,*

- lauthawna te leh kipâk lona ding thu tamtak hiatna in hung khang lian tiat tiat ding lahi.*
6. *Pathian lekhabu thiangotho Bible la sim zing chun, la lungkhamna te, la lauthawn nate leh la buainate zosia a pat zalenna lampi hun ki mudawk ding lahi.*
7. *Lal Jesu'n mipi sângnga a vâk-vana thu haw bang khah, tulai i news paper ua hin chuang taleh, a sim nuam ki tam in a e..!*
8. *Pauchap lawting thei mi news paper ah, a hung chuan khâk ahileh, i ngaisâng ma ma sek ua, a hi'nla, mithi nasan kaitho thei Lal Jesu chanchin Bible ah um hina pi'in, sim le i sim pei ngai seklo uh ahi.*
9. *Genthei tâkluat ziak ah thil sukhial sâng in, hausat bêk ziak ah thil sukkhial khâk a bailam zaw ahi.*
10. *Hausat ziak ah kipak ding hitaleh, solomon khêl ah mi kipak ding um puantin, himaleh, solomon in khawvel ahin kipakna ala mulo ahi.*
11. *Khawvel ah mipil pen Solomon nasan in ala mudaw zawlo kipakna hi, eihawn umding ah taksang in hawl hawl leu hinle, mudiak lo ding i hiu ahi.*
12. *Thil umlo hawl te leh a umlona thil hawl te chu amau leh amau ki sugenthei bep ahiu a, aneipa kiang ah thil hawlo leh a neilopa kiang ah thil hawlte chunle bangma tik in mu'ngai him him lo diu ahi*
13. *Mihausate hin a hausak chanpите bep hi mamawu ahi puau ah, migenthei, kilawfa te hile amau â dia mamaw ma ma ahiu ahi.*
14. *Migenthei kilawfa haw hi um talo in, mi hausu ngen kihi taleh, i bawl theilo zosiau hi kuan ei bawl piak ta diam?.. nasem ding mi um talo ding chuh! a haksat di dân dân, la ngaitua kha ngai em?*
15. *Mi In mi lou ah nasem ah kilawfa haw hi mawk musit ziang ding ahi pua, amau haw zâl ah hih, mahajon kiti hi umthei chau ei veu.!*
16. *Mi hi nasepna van ah aki van ziaikin migenthei dingin gingcha ziang kinla, vanpha leh smart tak ah a um zing ziak inle mi hausu dingin gêl ziang diak kin.*
17. *Noah hunlai ah kuang tukkna châng hephalo te kha i awimaw sek ua, tulai ah kuangtuk le ngailo, 'ging le chun hingla'*

- ti mai mai le, ging nuamlo a ki-tam nalai ahi.
18. Noah hun akhan, eima hukdamna kuang kituk chiat ngai ahia, tu'hun ahileh, mizosia hukdamna kuang tuk zawsa a hita, a lûtding bep vát hita, lut gawlo aki tam nalai ahi.
19. Noah hunlai mite gitlona kha Pathian lungthim natna kham a tin chun, tulai mite gitlona hile Pathian lungthim natna kham ting tama ma in a e..!
20. Noah hunlai mite kha Pathian helo ah khawvel nawpchên hid-ing ahiu ah, tulai mite vâng, he nasa sa ah, khawvel nawpchên ihu ahi
21. A hawn hawn ah Pathian awi hi thil haksa talua ei pua, i chang chang ua Pathian i awi hawi nau em? ti zawk hi ngai-tua kûl zaw chu ahi.
22. Bang mission ah la um em? bang kochuam ah la kikhawm sek em? ti in i ki dawng tua sek ua, "Ginna chun la um nau em?" ti in i ki dawng ngaitua seklo uh ahi.
23. Mi chung ah i bat le hinaisa-ilo hial, êngsiatna te, mu'dana te, sawisel nawpna ti haw hi, i vak nei khasek ua, i bat diktak zawu 'hepina' kiti hi mi i penu-am ngai seklo uh ahi.
24. Tulai kochuamte hi i etleh gingtu khat hina ah i ki ngain-at nau sâng in, biakin khat ah i kaikhawm na zal ua i ki ngainat nau hi sângzaw hileh a kilawm hi.
25. Mawllai hun akhan ki hepina a umzaw, tu hi pilna khang ahi ta, hepina a dai deu deu ta ahi.
26. "Kihepituana beplo chu kua-ma thil ba kiu in.." ti ahia (Rom 13:8) bat dang dang chu i nei chiat nau ah, kihepina hi mi chung ah i bat uh ahi lam i he pha seklo uh ahi.
27. "Hepina hin a Invêng siatna ding bangma a bawl puai" ti ahia, (Rom 13:10) Insak, In-thang u leh nau, iki bawl tuanau haw hi i et ahileh, hepina nei i hiu leh hilo uh a hung kichian zêl sek ahi.
28. "Hepina chu dawha panglo hi hen,.. " ti ahia (Rom 12:9) eilak ah hepina um haw hi bang hepina a diam? dawha chalák ah ki bawl tuana a tam in a tam ma ma ahi.
29. Bible in "Mihing dam kum hi kum sawmsagi ahi" atia, vâng-siat ziak ah kum sawmsagi tinglo ale thi'thei ahia, dudaklo ziak ale kum sawmsagi tinglo

- ah thi'thei hi talua ahi.
30. Tulai ah kum naupang cha thi haw hi vângsiat ziak sâng in, ama leh ama ki bawl ah ahunlo ah thi a tam ta ahi.
31. Sawlkar in mipi vêng ding sepai tampi anei ah, himaleh eima taksa damtheina ei vêng ding sepai khatle a umlo ahi.
32. Lekha thiam in chitna sângtak nei maleu hinle, eima damtheina ding ah ki vênna châng i hiatlo ua, i gawl in a du taphawt i si-amlût miah miah mai ahi chun, pil tawk kisa leu hinle ngawlna viau khat nei kihi ding ahi.
33. Sam ziaktu chun "Migilote phatsak gual ah um ngailo leh musitte chutpha kichu ngailo mi chu a nau a vâk hi" atia, tulai chu migilote leh musit tu ah pang aki tamzaw ta ahi.
34. I dawî dawî mu ziang theina leh i dawt tapo lawtin ziang theina lampi chu, Lal Jesu'n "Nanghaw le keima ah la umzing ua, ka thute le nangmau ah a umzing chun" ati'hi ahi. (John 15:7)
35. Lal Jesu'n ".. Keima lo in bangma la hi'thei puau.." ei tia (John 15:5) eilawi mi tamtak chu Lal Jesu panglo ah thil tamtak bawl gawte ihi sek uh ahi.
36. Lal Jesu'n "Thagau thutak chu a hung tun takleh, thutak zosia'n hun puilût intin.." a tia (John 16:13) tulai ah gingtu hi'in, ginglotu hi leu hinle, ei ki puilûtna sek hawu hi, thutak umna hi tam maw in a e..!
37. Banggual buaina um lele, sum in a sucham thei ah, himaleh minsiatna haw hi sum in a sumai theilo ahi.
38. Ki tualthana haw ziang hile sum ah kiho chamthei chu ahi-nai.. ahi'nla a thisa chu sum bangzat kipe tua le hinle hinsak kît thei chu hitalo ahi.
39. Mualpho theina haw hile sum ah melkhu thei dan chu a um thei tho ah, a hi'nla i za umna ki susia khata chuh, sum ah chûlnâm thei chu hi talo hial ahi.
40. Numei hi'n, pawsal hi ziang lele, a thianthona a matsua khâk leh, sum ah melkhu thei chu ahia, ahi'nla a buakna chu sum bangzat inle a suthiangtho thei kît talo ahi.
41. Kua kua hileu hinle, i lungthim ah um leh i ngaikhawk khawk hi kigên mun tei tei sek ei vei..!
42. Lalpa Pathian chu lungthim, ngaituana leh hâtna zosia ah hepi ding ti thu hi, i chate het ah gênnawn zing ding ti thu-

- piak ahia (Deut. 6:5-7) eilawi in zia thu hi i chate het ah, i gên khâklo lawi uh hiding ei vei maw..!?
43. I chate het ah i gên mun pen sek u hi, bangthu a hem? ti'in ki ki dawng taleh, Lalpa Pathian hepi ding thu hih, tam khel puan a e..!
44. I chateu thiamna ding i ngaikhawk tuk ua hin, a thagau hukdamna diu ngaikhawk tama leu hin, i gam uhi hiti buai khel-lo maithei ei vei..!
45. Khawvel ahin aw.. let leh lal ding i kichu chu ziang nau ah, ngaitua mawng mawng tia, a neute sâng in alian haw hin sukhhial ahau nuam zawu ei vei..!
46. Insung leh khawtâng ziang a hinle a neulam in thil a sukhhial leh aliante'n maw a pua sek ua, a lianpen in thil a sukhhial leh a maw zosia ama'n a kipuak di hisek ei vei. .!
47. Hât hile i ût ten sek nau ah, mihâtte hi ei veu.. a buai nuam chuh! a ziak chu amau sâng ah hâtzaw ding mi hung umzêl ahi ziak un..!
48. Mi damtheite sâng in mi damthei lote'n Pathian a bêl zawu a, mi damthei talua haw hin Pathian a hepha puau ah, sual ah pûk kiti zosia hile, mi damtheite hi nuam ei veu..!
49. La phuaktu'n "Buaipei kham Jesu, hinpi kham Jesu".. ala tia, eilawi in Jesu hi buaipei kham leh hinpi kham ah i ngailo ziak uh adiam? sum po i buaipeu a, phungthu po i buaipeu ah, Jesu sang in thildang i buaipeu nasa zawsek uh ahi.
50. Paul chun, Lalpa Jesu apat amu, Pathian hepina chanchinpha hiatsak ding chu, ngaikhawk pen in anei ahi. (Nas. 20:24) eilawi ngaikhawk haw tawh vang, Paul ngaikhawk hih, a ki khe e..!
51. Tulai kochuamte haw hin, kochuam hausakna ding leh, eima pawl ah mi tampi lawilût ding hi ngaikhawk in i nei gam tau ah, chanchinpha puanzâkna hi ngaikhawk in inei gam talo uh a bang hi.
52. I gam ah chanchinpha ahung lût lim lai khan, Bible le anei nai puau ah, himaleh Pathian thu kha buaipei pen in ala nei thei ua, tulai mite'n vang, i khut chiat un Bible i chawi chiat tau ah, himaleh Pathian thu buaipei manlo zên ah buai i tamtau ahi

NEK DING ATAM VANG AH KIAL A THI

Amos 8: 11-12; Joel 2: 31; Acts 2: 20-21

-by Dr. S. Chongloi

World War II lai a Nazi Concentration Camp a sukgenthei leh kial thuak a um Poland mi *Maria Janczuk* kitinu chu Galpi kichai zaw tiang inle a sukgenthei nasat takluat ziak un, alungthim abucai den ta ahi. A vainung in England gam Leeds mun ah a chengin, January 22, 1971 chun aumna mun a athisa'n mudaw ala hi. Ama hi kial thuak a thi dan in a kigen hi, athi chun ataksa gik dan chu kg 19 bep hi in a kigen hi. Kial ah thinu hi a-inna chun nek leh chak ding bangkim chu bukim tak in a um hi, ti'n a gen ui.

Athi thu suizui ah pang Police pa gendan in, "A umna mun chu nekding kizawkna mun abang hial hi" ti'n agen ui. Nek khawlkhawmna bawm te ah chun nek ding akikawi dim chitchet in-aktui, bawngnoi, Vaithum, sa leh nga sun ah nek thei leh zan ah nekthei ding aum in, hinla ama hi a hinkhua chiasa ah concentration camp ah uma aki engbawlnate chu alung ah chamzing in, nek ding tamtak a kikawi vanga chu nelo in Kial ah thi'n a kigen ahi.

Maria Janczuk in anek ding tamtak akikawi vanga, nelo ah kial ah athi gualin, Ei uh le malzawlina buting tak ah ei kipiak vangin malzawlina I chang nuam puau a, Jesu ging zosia'n

hukdamna anei dingua thupiak aum vangin itaksang nuam puau a, chamna diktak ei kipiak vangin chamna inei nuam diak puau in, kipakna leh hepina bukim eikiplik tak vangin, kipakna leh kihepituana inei nuam diak lo uh ahi. Zia haw Zosia hi In dimset a inei vangun nelo kial in ithi tho tho sek uh a hi.

Tulai in mi tamtak in Pathian thu a kigen a, simding ahiloleh hiat ding atam vangin helo leh simloin Gawtmun zuan in I chia sek uh ahi. Thil zosia'n phat a kinei chiat ahi. Apat lap lo chun anungko kit thei ahita puai. Zawlnei Amos in, "Gamsunga kial katunsakna ding hun ahungtung tai. Mipi kial thuak ding chu nek leh chak pawimawna hipuan tin,

tui ducha dangchakna le hidiak puan'a. Pathian thugen ducha gilkiak leh dangchak hiding ahiu. Kei bangkim hithei Pathian in kagen hi. Mipi hin sak-leh-thang, sim-leh-mal ah adel velvel diu ahi. Muntin a Pathian thugenna del velvel in tin uh, mu la mu diak puan'au" tin Pathian in a gen hi.

Joel 2: 31 a ki gen Acts 2:

20-21 a kigen sawn, "Nisa hung thim ding, tha thisan guala san ding; Pathian nikhua nasatak le akipuandawna ding ahungton masanga chuti ding ahi. Zia phat chuleh kua hileh Pathian min lam tapo chu hukdam in um ding ahi," ati hi ahung guitun masangin Pathian panpina hawl dingin I ki chial uh a hi.

--o0o--

Presbytery sung thu chuam chuam – Oct. 2022

1. Dt. 30/8/2022 zan in unau TPKTP Nghathal Branch in KKP(KSP) Nghathal Unit te visit bawl in kikhawpna nuam tak ah mat a hi.
2. Dt. 5th Sept. 2022 ni chu amasapen dingin Presbyterian Mission School(PMS), Tispari M/F ah Teacher's Day Celebration amang ui.
3. Dt. 5th - 9th Sept. 2022 sung in Leilon P.C ah Manipur Synod Mobile School nei ahin, student 31 te apang thei ui.
4. R&D Committee min ah Dt. 4th Sept. 2022 mi chu KSP Moderator mapuina'n Exe. Secy., Secretary leh Tuithanak District Bialtu pang in Tonglon 'D' leh Saipum ah damlo vena ava nei ui.
5. Dt. 26/9/2022 ni'n Vaiphei Insung Maicham Committee ah Chairman Rev. Kh. Paukhomang leh Secretary Rev. S. Ginzalam te apat in Insung Maicham bu Vol. II & III Office copy dingin Gift ahung bawl un, Rev. Thanglianmang, Moderator in ala dawng hi. Vaiphei Insung Maicham Committee te chung in kipak thu i gen ui.

HIAT DINGA PHA
(Based on the Bible BSI publication)

~by Tv. Daniel, Tangmual

THUTHUNGLUI (OLD TESTEMENT) SUNGA CHANG(verse) TAMPEN TE:

S/No.	Lekhabu	Bung leh Chang
1	Genesis	24:1-67
2	Exodus	12:1-51
3	Leviticus	13:1-59
4	Numbers	7:1-89
5	Deuteronomy	28:1-68
6	Joshua	15:1-63
7	Judges	9:1-57
8	Ruth	2:1-23
9	1 Samuel	17:1-58
10	2 Samuel	22:1-51
11	1 Kings	8:1-66
12	2 Kings	4:1-44
13	1 Chronicles	6:1-81
14	2 Chronicles	6:1-42
15	Ezra	2:1-70
16	Nehemiah	7:1-73
17	Esther	9:1-32
18	Job	38:1-41
19	Psalms	119:1-176
20	Proverbs	8:1-36
21	Ecclesiastes	7:1-29
22	Song of Songs	2:1-17
23	Isaiah	37:1-38
24	Jeremiah	51:1-64
25	Lamentations	3:1-66
26	Ezekiel	16:1-63
27	Daniel	2:1-49
28	Hosea	2:1-23
29	Joel	2:1-32
30	Amos	5:1-27
31	Obadiah	Chang 1-21
32	Jonah	1:1-17
33	Micah	7:1-20
34	Nahum	3:1-19
35	Habakuk	2:1-20
36	Zephaniah	3:1-20
37	Haggai	2:1-23
38	Zechariah	8:1-23
39	Malachi	3:1-18

HIAT DINGA PHA
(Based on the Bible BSI publication)

~by Tv. Daniel, Tangmual

THUTHUNGLUI (OLD TESTEMENT) SUNGA CHANG(verse) TAWMPEN TE:

S/No.	Lekhabu	Bung leh Chang
1	Genesis	16:1-16
2	Exodus	11:1-10
3	Leviticus	12:1-8
4	Numbers	12:1-16
5	Deuteronomy	34:1-12
6	Joshua	20:1-9
7	Judges	17:1-13
8	Ruth	3:1-18
9	1 Samuel	29:1-11
10	2 Samuel	4:1-12
11	1 Kings	5:1-18
12	2 Kings	1:1-18
13	1 Chronicles	20:1-8
14	2 Chronicles	27:1-9
15	Ezra	1:1-11
16	Nehemiah	1:1-11
17	Esther	10:1-3
18	Job	25:1-6
19	Psalms	117:1-2
20	Proverbs	9:1-18
21	Ecclesiastes	6:1-12
22	Song of Songs	3:1-11
23	Isaiah	12:1-6
24	Jeremiah	45:1-5
25	Lamentations	1:1-22
26	Ezekiel	15:1-8
27	Daniel	12:1-13
28	Hosea	3:1-5
29	Joel	1:1-20
30	Amos	4:1-13
31	Obadiah	NIL
32	Jonah	2:1-10
33	Micah	3:1-12
34	Nahum	2:1-13
35	Habakuk	1:1-17
36	Zephaniah	2:1-15
37	Haggai	1:1-15
38	Zechariah	13:1-9
39	Malachi	4:1-6

'DAMNA AW' PHUNGVUKTUTE :

PATRON MEMBERS :

- | | |
|-----------------------|-------------------------------|
| 1. Pu P. Vaiphei IAS, | Imphal |
| 2. Pi Nemzakim, | S.Kawtlian |
| 3. T.Upa Haulallawm | S.Kawtlian |
| 4. Upa Thienkhomang | S. Kawtlian |
| 5. Upa Laltinkhup, | HQ. Church, Tuibuang |
| 6. Pi Manliankim, | HQ. Church, Tuibuang |
| 7. Upa D. Mina, | Lingsiphai |
| 8. T.Upa Ph. Gena, | Lingsiphai |
| 9. Pu. Khamlal | Saipum |
| 10. Pu Khamliankap | Saipum |
| 11. Pu. Tinlunlal | Saipum |
| 12, Pu. S.Kapbawi | New Delhi |
| 13. Upa Genhau | Central Church, Compound veng |
| 14. Pu. Khailianbawi | Central Church, Compound veng |
| 15. Pi Kimtawi | Kohima |
| 16. Tv. Daniel | Tangmual |

MEMORIAL GIFT :

- | | |
|----------------------|--|
| 1. Pi Deem Melody, | Central Church, (Rengkai)
<i>[In loving memory of (L) Upa Lamthianlal]</i> |
| 2. Pi Rebekah | Kangvai
<i>[In loving memory of (L) Pastor Khaivung]</i> |
| 3. Upa Liansawmthang | Lingsiphai
<i>[In loving memory of (L) Pu. Henzagen]</i> |

SUPPORTING MEMBERS :

- | | |
|---------------------------|-----------------|
| 1. Upa Khomlunlal | S.Kotlian, |
| 2. Pu. S.Thangminlian | Lingsiphai, |
| 3. Pu Lelboi, | Lingsiphai |
| 4. T.Upa Lalneilian | Central Church, |
| 5. Pu EL Soson | Central Church |
| 6. T.Upa Genminthang, | Central Church, |
| 7. Pi. Kimneihawi | Saipum |
| 8. T.Upa J. Mark | Saipum |
| 9. Pu Genthiankap, | Nghathal |
| 10. Pu Lianzakhup | Nghathal. |
| 11. Pu Lemthang | L. Mission Veng |
| 12. Rev. S.T.Kaia Vaiphei | Nghathal |
| 13. Nk. Dimkhoniang | Zikpi Tampak |

ENCOURAGING MEMBERS :

- | | |
|-------------------|-----------------|
| 1. Pu K. Minlian | Tangmual, |
| 2. Upa Ph. Kamlam | L. Champhai, |
| 3. Upa S.T.Siam, | L. Mission Veng |
| 4. Pi Chhungi | Hq. Tuibuang |
| 5. Pu S. Paumuan | Saipum |
| 6. Upa Tongneilal | Leilon |
| 7. Upa Henkholam | Kangvai |
| 8. Pu Lianbel | Lingsiphai |
| 9. Pi Niangphal | Bisanmual |
| 10. Pu Goumang | Tangmual |

Damna Aw monthly magazine hi tutiang ahin kochuamte'n phungvukna i bawlte'u ziaka hin chiazal i hiu a, kuale phungvukna bawl utte a ding in bangtik lai in le bawlthei zing ahi.

(i). Patron member- Kum 3 (three) a ding in. ₹. 3,000/-

(ii). Memorial Gift- Kum 2(two) a ding in. ₹. 2,500/-

(iii). Supporting member- Kum2(two) a ding in ₹. 2,000/-

(iv). Encourager- Kum 1(one) a ding in. ₹. 1,000/-

Chun, sum thawt nuamte a ding in:

A/C name: Khuga Sadar Presbytery(MPCS)

A/C nos: 32483318505

Branch code: 6182, CCpur

CIF nos: 86412486695

IFSC nos: SBIN0006182.

--o0o--